

語

石

語石卷三

長洲葉昌熾

聘禮東面北上上當碑南鄭注宮中必有碑所以識日景引陰陽也凡碑引物者宗廟則麗牲焉其材宮廟以石窆用木祭義君牽牲旣入廟門麗於碑鄭注麗繫也謂牲入廟繫著中庭碑也釋名釋典藝碑被也本葬時所設施輓轡以繩被其上以引棺也臣子追述君父之功美以書其上後人因焉故建於道陌之頭顯見之處名其文就謂之碑也此碑之緣起也

右論碑之名義緣起一則

碑之有穿所以麗牲亦所以引綽卽檀弓豐碑注所謂穿中於閒爲鹿盧下棺以綽繞是也自後世立碑但以述德敘事

而失其本義遂不盡有穿矣案史記始皇本紀上鄒嶧泰山  
皆云刻所立石不言立碑則秦時碑字尙僅用之於宮廟繫  
牲之石及窆木凡刻石之文皆謂之碑當是漢以後始歐陽公集  
古錄曰欲求前漢時碑碣不可得則冢墓碑自後漢始有也  
宋景文筆記曰碑者施於墓則下棺施於廟則繫牲古人因  
刻文其上今佛寺揭大石鑄  
文士大夫皆題曰碑銘何也

王暢甫碑版廣例曰漢碑穿外有暈其暈繚繞或卽自穿中  
出或別從穿外起尙存古制引緯之意其碑文有居穿下者  
有因當穿而廢其數字者其碑首或刻螭虎龍雀以爲飾或  
直爲圭首方銳圓橢不一其制額書亦不必皆在正中偏左  
偏右皆有之 右碑穿二則

漢魏碑額筆法奇偉可喜非後人所能髣髴蔡君謨見後漢

南陽太守秦君碑額苦愛之歐陽公遂著於錄近時金石家如汝南周君碑額三階大德禪師碑額其碑雖佚猶錄而存之惜拓工棄如弁髦余所見墨本能拓陰者十不得四五拓額及兩側者尤難得若兼拓額之左右蟠螭則更絕無僅有故非親至碑下摩挲古人制作之精末由得見牛空山金石圖劉燕庭金石苑皆摹全形一展卷而貞珉如見此著錄之善者矣

題額篆書爲多分書次之有真書

北張猛龍南葛祚爲始

有行書

張從申銅

井鎮福興寺碑

有籀文

唐開元處士王慶墓幢宋越王樓記

繆篆

凝禪寺三級浮圖○諸體各舉一碑爲例

不盡此

篆體往往不合六書偏旁繁省時乖古誼魏廬江太守

范式碑額廬內之田从困范內之已从巳則在三國時已如

此唐宋御製碑多以飛白題額如唐太宗晉祠銘汜水紀功  
頌孝敬皇帝睿德紀武后昇仙太子碑諸額及宋仁宗賜陳  
繹碑額皆飛白書也其翩翻之態著紙欲飛前人謂之插花  
舞女草書絕少蓋章草皆取流便碑榜莊嚴本相鑿枘金宴  
臺國書碑題額十二字亦國書不可釋元至正三年重修佛  
堂院記額題郊鎔器鄧窠春趙撝叔謂卽重修佛堂院記六  
字而碑陰題首賴玘璣璣四字終莫能明也壺關縣紫團鄉  
慈雲院碑銘宋董道書額其文爲彙慈雲窠牌茂六字卽新  
慈雲院碑文也新作彙文作茂不知所出其刻有陰文有陽  
文陽文洪氏隸續謂之黑字猶本草目陰文之字爲墨蓋子  
共分別略同但陰陽易位耳又有中間凸起四圍一線陰文

深陷如坳大都淺刻平漫黑文滿布此由石質易裂若刻之過深而細稜稜露骨觸之卽損恐不耐氈椎耳谷朗碑額題吳故九真太守谷府君之碑凡十一字一行直下其次孔褒碑一行九字校官碑亦四字直下而左右有白文兩線深陷其制略異然漢碑如此者少大抵皆分作兩行當穿上居中惟高頤額稍偏右有在穿左右者卽以穿隔之衡方碑兩行之中刻白文一道爲界陳德碑分棋局如九宮額篆六字左右書之而空其中三格六朝以後始有多至三四行者皆用棋子方格惟陳懷志北嶽府君碑額黑字白圍一圍兩字長方如元人押奇古可愛其至多者宋龔龍顏碑題宋故龍驤將軍護鎮蠻校尉甯州刺史卽都縣侯勲使君之碑唐白雲

先生詩勅題唐宗大聖皇帝開元神武皇帝賜白雲先生書  
詩並禁山勅碑皆二十四字魏元萇溫泉頌額題魏使持節  
散騎常侍都督雍州諸軍事安西將軍雍州刺史松滋公河  
南元萇振興溫泉之頌共三十六字若北周強獨樂碑多至  
十五行六十字則自漢魏迄宋元所見者僅此一刻而已額  
首多上銳如楮圭或橢圓如覆孟其平方者字多橫列陶大  
舉碑題宣州刺史陶府君德政之碑凡十一字宋潼州府學  
鄉賢堂記及富樂山詩額八字皆一字一行橫列唐殷君夫  
人碑四面環刻額十二字橫列前後兩面每面六字亦有一  
石相連題首卽在碑字之上不別立額者碑陰多無額惟宋  
顯伯造象之陰分五層上層佛像次層橫列邑社曹思等石

象之碑九字漢鄭季宣碑陰有橫額八字曰尉氏故吏處士  
人名馬鳴寺根法師碑額作二層上層馬鳴寺三字陰文暨  
列下層魏故根法師之□□八字陽文橫列此皆石刻中所  
希見非通例也王蘭泉曰大厯文廟新門記篆額六寸分二  
行字縱二寸橫一寸額字之小無逾於此余謂額之大者若  
臨桂摩崖之平蠻頌宋頌皆字徑逾尺蓋十倍於新門記矣  
夫碑之有額猶書之題籤畫之引首所以標目也往往有碑  
文漫滅如昭陵各石賴其額尙存得知之石墨鐫華於馬周  
碑云今摹碑者多不摹額是一恨余爲下一轉語云今磨碑  
者多不磨額是一恨此兩言東西易向其爲愛惜古人之心  
則一也自唐以後事不師古如八都壇神君寶錄額題大唐



二字龍門牙微五年殘造象其首書曰大唐之碑晉祠銘額  
題貞觀廿年正月廿六日令人覩額不知其碑則駢拇指而  
已至若靈源寺垂拱造象額上刻經主題名萊州刺史唐貞  
休碑於篆題空處繪貞休象柏梯寺碑撰者徐彥伯書者胡  
輔之皆署名於額雖非古法要爲金石之變例存之可資異  
聞

漢碑多蟠螭唐碑多蟠龍蟠螭之形有如犇馬四足馳驟兩  
龍中間或綴以珠有雲氣繚繞之唐大曆八年裴平書文宣王廟新門記額有咸通題  
字王蘭泉云題字處上銳當銳處懸一珠二龍繞之漢碑畫龍形若如馬四足犇馳此碑與後世之蟠龍無異碑刻二龍  
捧珠始見於此亦有下連碑側與額爲一余所見全形如九成宮醴  
泉銘唐之御製各碑宋趙懿簡碑追琢工細無與倫匹嵩岳

體元先生潘尊師碣尤奇偉前人紀王忠嗣碑側刻水獸奇

異怪偉

吳山夫金石存

嵩陽觀聖德感應頌頂蓋雲龍下座刻丁甲

之象左右旁刻花紋周鋪俱範金彩歷歲久遠絕無損蝕

說嵩

王蘭泉紀夔龍顏碑穿上蟠龍穿左右日月各徑五寸日中

刻踰烏月中刻螭余所見宋龍昌期勅額亦如之又紀唐

孫師範書太師孔宣公碑碑首形圓左右刻二仙子戟冠羽

衣騎鶴而行左右相向鶴含草如竹葉周刻大花葉以爲唐

畫真蹟以其言推之漢白石神君碑圭首左右兩獸獸內一

人以兩臂拄獸腹似彝器文之子孫字形張遷碑四面蟠螭

圭首銳處兩鵠相對此亦漢畫之至精也又若道釋兩家各

尊其教碑額往往不題字而造象世所知者如懷仁聖教序

額上佛像七軀實歷二年皇澤寺造象碑額佛像一龕道因法師碑刻釋迦牟尼觀自在大勢至三佛像於額其尤奇者松陽葉有道碑額上畫艮卦作☶象治水靜穢丹命告額中層刻符籙離奇俶詭愈不可究詰矣

柳子厚述唐時葬令云凡五品以上爲碑龜趺螭首降五品爲碣方趺圓首此本唐六典蓋所述者時王之制也然稽之唐碑亦不盡符如逸人竇居士未有爵位以宦者之父而李北海題其碑曰神道潘尊師碑巍然巨製而題爲碣如此之類未可枚舉

前人題名碑陰亦題於額之兩面倉頡廟碑額卽有漢題名兩則皆在正面若額之陰有題於立碑時者中山法果寺經

主題名是也有後人登覽摩挲因而題名其上者孔林華嶽諸碑是也北齊蘭陵王高長恭碑額陰有五言詩一首則王弟安德王經墓興感而作也隋首山栖巖寺塔其額陰有唐咸亨三年御製詩而姚元崇韋元旦諸什皆刻於碑陰顏魯公家廟碑李少溫篆題之後亦有魯公書十行八十餘字齊隋兩碑久著於錄而其額世無知者近十年中始先後拓得傳於世以是推之額陰有字沈淪未顯者尙當不盡於此有勒碑在先而題額在後者虞牙興廟堂碑武德時建至武后時相王旦始奉勅題額今西安宋刻本非舊額舊額爲大周孔子廟堂之碑八字又說嵩記秦王告少林寺教額隸書曰太宗文皇帝御書後人復記於碑云已上七字開元神武

皇帝書蓋敎爲太宗筆額爲元宗筆華嶽精享昭應碑開元八年劉升書左方有華陰縣令盧倣題分書十六字其時興元元年十二月也又有銀青光祿大夫檢校華州刺史上柱國李休光題額二十字錢竹汀云驗其字體亦出盧倣蓋勒碑之後又六十餘年而始題其額耳

潛研堂金石文跋尾萬壽山修觀音祠記慶元五年劉震書并篆蓋古者墓有兩石一書誌銘一書某官某府君墓覆於誌石之上故有篆蓋之稱若宋游師雄墓誌全用碑式其篆卽刻於額而尙沿篆蓋之名已失其義此記當稱篆額而亦云篆蓋此古聖所譏觚不觚者也又跋紹定二年梅隱庵記云宗學諭方萬里篆其額自稱題蓋攷唐人誌墓云題蓋別

於篆而言之

謂用真行分書

此記與額無二石又作小篆體而襲題

蓋之名兩失之矣余謂碑額沿題蓋之譌始於南渡以後汴

京以前未聞也然宋碑所見尙少慶元五年晉陵乾明寺古

殿記其額八分書稱鄒鑑隸蓋嘉熙改元常熟縣教育言子

諸孫記其額正書稱王遂題蓋寶祐三年太平州重建學記

稱鄭埜題蓋此三石蓋字雖誤上一字猶各得其實惟臨桂

趙郎中德政碑以摩厓亦稱篆蓋

端平丙申

則其失更甚不徒如

錢氏所譏矣元碑承訛踵謬不一而足如常熟縣重修文廟

記

至元三十一年

徐珍題蓋湖州報恩光孝寺置田山記

至元甲申

古涪

文及翁篆蓋慶元路重建儒學碑

至元二十八年

王宏篆蓋太平路

重修儒學記

大德三年

侍其君佐題蓋嘉興路重修儒學碑

大德庚子

范霖篆蓋采石重建承天觀三清殿記元至治元年李希謝篆蓋嘉

定州重建廟學記至順三年潘詡篆蓋東祁王先生歸田興學記

至正九年換佳篆蓋正定龍興寺秦王夫人施長生錢記至正十四年

周伯琦題蓋余所藏石刻有元一代最少已有九碑若至元

五年代祀北嶽記額爲尙師簡書至正二年重修無錫州學

記額爲黃潛書皆稱篆題則固無不可耳右碑額七則

門生故吏兩漢爲府主立碑邑子維那六朝爲先亡造象出

錢千百列名碑陰其名自一列逾十列梁蕭憺碑共二十列

則莫多於此矣漢碑門生之外有弟子朱竹垞攷故吏之外

有故門下書佐故功曹故循行循行亦釋爲脩行又有處士

鄭義士魯峻鄉望民望敬史族望張猛之屬姓名之上冠以

國義士曹全鄉望民望敬史族望張猛之屬姓名之上冠以

郡邑爵秩惟魏范式碑但有姓字而已此碑陰之通例也其  
有一碑兩刻者達奚珣游濟瀆碑一面刻記一面刻序美原  
神泉碑韋元旦序及賈言淑等詩刻於正面徐彥伯序及尹  
元凱等詩刻於背面鹽池靈慶公神祠碑陽爲頌崔敖文韋  
縱書陰爲記劉宇撰書東方朔畫贊碑顏魯公旣書夏侯孝  
若文復自敘其事刻於碑陰宋廣平碑側述宋公之遺事補  
碑文所未及此皆一碑前後而自爲首尾離之兩傷合之兩  
美又魯公多寶塔銘爲楚金禪師而作也而吳通微楚金禪  
師碑卽刻於其陰雖書撰年月各殊要爲一人之事若宋夫  
子廟碑在隋賀若誼碑陰天禧三年敦興頌在虞才興廟堂碑陰皇祐三年復  
唯識院解記在歐陽信本皇甫誕碑之陰皆刻於舊碑之陰北海任令則



碑其陰亦有元人重刻碑記譬如空地建築不侵鄰界攷北  
周天和二年華嶽頌其陰刻唐人精享昭應碑願亭林金石  
文字記云古碑陰多無字故後周之碑唐人得而刻之武虛  
谷云水經注樊城西南有曹仁記水碑杜元凱重刻其後書  
伐吳之事又渭水漢文帝廟一碑建安中立鎮遠將軍段熲  
文給事黃門侍郎張昶造昶自書之魏文帝又刻其碑陰二  
十餘字以此證之碑陰刻字晉魏時已然矣但必無字而後  
始刻明人不學遇陰之有字者亦悍然磨而刻之貞石何辜  
遭此荼毒白石神君碑陰下  
截卽爲明人磨刻又今人立碑往往龕置壁間僅  
露正面其陰及兩側皆深陷于壁如臨桂逍遙樓石刻其陰  
爲宋程節湘南樓記今拓本但有逍遙樓三大字而程記以

在壁中不能拓吾鄉光福寺兩幢土人以其裂也樹木柵護之砌築牢固自此遂無傳本此與禁錮何異所願好古者爲開一面之網爾

或問碑陰題識金石家著錄通謂之碑陰記有異乎曰是有別焉紀信碑述獲石之神異大智碑美作者之文章其陰文字卽爲碑文而設此一例也曹翰顏魯公新廟碑米南宮作碑陰記敘神仙之事述瑣記廣異聞此猶稗官外傳以補史傳所未及又一例也昭仁寺碑張洎書歐陽公集古錄一則於後敬識前言以告來者述而不作信而好古此又一例也昭陵李衛公李英公兩碑宋游師雄碑陰題記論其功烈詳其制度詩有之曰高山仰止景行行止此又一例也或以仆

而重立如魏賈思伯碑宋元兩次重立皆記於碑陰或以煨而重鐫如比干廟兩碑魏孝文帝一石宋元祐中重刻有吳處厚記可證貞觀十五年贈太師詔并祭文元延祐五年重刻有韓沖記可證興廢舉墜識其歲月此又一例也惟李陽冰拙先塋記宋大中祥符二年重刻而其側獨孤密銜名三行猶是唐人舊刻蓋宋人卽用原石重開碑文雖泐而碑側之字猶泐之未盡此外石刻各體書者其陰或以正書釋之如鑄鼎原銘袁滋篆書其釋文卽在碑陰上列感通塔碑一面爲西夏書一面正書釋文是也有刻詔勅及進表者如曲阜唐孔宣公碑陰刻武德九年乾封元年詔勅兩道及皇太子宏表青城山常道觀碑一面刻元宗勅一面刻張敬忠表

宋崇甯二年范致君興學聖德頌其陰卽刻致君奏進表又  
如房彥謙碑陰記賜葬贈贈皆所以紀述榮遇甚盛典也有  
刻簿籍者如唐濟瀆廟北海壇祭器銘碑陰刻祭器甚詳宋  
淳熙十一年廣州贍學田記其陰刻增置田畝元至正二十  
一年靜江路新城記其陰刻工役丈尺皆其事也有刻譜系  
者如郭家廟碑其陰刻汾陽所厯二十四考及子孫行次爵  
位吾鄉泰伯廟提點刑獄司公據碑其陰刻吳泰伯世系圖  
是也有立碑之人功德可紀卽於碑陰勒文爲頌如曲陽北  
嶽廟兩碑開元廿三年崔鏐一刻其陰爲段惜德政記天寶  
七年戴千齡一刻其陰爲賈循德政記是也其有陳符瑞以  
彰嘉貺者如共城百門陂碑其陰詳述祈晴禱雨應驗及節

錄僚屬詩句裴諧儲潭神廟頌其陰爲祈雨感應記慶唐觀  
金籙齋頌天寶二年刻而其陰有建中三年瑞柏記此亦吏  
民頌德之文而稍變其例者也有刻佛經者如北齊雋修羅  
碑其陰刻維摩經見阿閼佛品唐法門寺千佛碑陰側刻涅槃經是也有刻畫象者如醴泉寺誌公碑其陰卽刻誌公象  
賀祕監逸老堂記其陰卽刻賀知章象開慶元年是也有刻佛象者淨住寺釋迦牟尼普賢劫象銘其陰刻千佛象吾鄉珠明寺宋碑一面爲須菩提象一面爲天台五百尊者象此類多出於釋氏亦造象之支流也有刻題榜者如北齊臨淮王造象其陰刻龍興之寺四大字宋武溪深碑陰上層刻九成臺三字下層刻詩境二字是也舉一反三未可殫述著錄之例

或宜分或宜合類誌於此以告世之訪碑者

諸碑以有文之面爲陽無字之面爲陰惟唐孫文才造象銘其文在陰面碑陽刻金城村剏修功德院記云是碑聖象曰陽暴露風雨摧剝因各捨淨財同募石工補完又曰尊容殘缺難施工巧於是同裏作表別刊是象相好端嚴慈容若動據此則原刻本在碑陽今刻在陰而轉於正面刻功德院記顛之倒之惟此一刻或曰碑之表裏視文以爲轉移陰陽何定之有則應之曰有額在

漢鄒君開通褒斜石刻宋晏袤題其後云敬書碑陰俾來者有以取信焉按此刻摩厓在舊城西南山壁上晏袤釋文及題記卽刻其後非碑也安得有陰讀者勿以詞害意可耳

撰書年月有題於碑陰者漢碑無此例也余所見惟北齊朱  
顯伯造象其陰題天保三年歲次壬申四月八日建都維那  
伏波將軍防城司馬穆洛書此外有書人年月在陰撰人在  
前者大厯八年黃石公祠記是也李卓文有樹碑年月在陰  
裴平書而撰書人皆在前者儀鳳二年魏法師碑是也顏魯公東方  
朔書贊年月亦在若鑄鼎原銘之陰上列釋文中列王顏表下列題名末  
行署河東裴宣簡書此則專指碑陰三列之正書其正面固  
袁滋篆書也猶之青城山碑其陰題常道觀主甘榮書迺指  
張敬忠表其正面之勅固明皇御書也昇仙太子碑正面聖  
厯二年其陰題神龍三年刻石兩面各爲年月又一例右碑  
陰五則

碑陰題名不足遞及左右側此立碑之通例漢倉頡廟碑及韓勅禮器碑卽如此魏王僧墓誌無篆蓋而於其側題故滄州刺史王僧墓誌等字唐姜行本碑其陰無字而薩孤吳仁牛進達皆題名於側石刻中如此者不多見有題撰書人於側者魏孔廟李仲璇碑側題內口書任城王長儒書碑共十字泐其一陸希道墓誌側題前涼州刺史兼吏部郎中陳郡袁翻字景翔製銘共十九字唐天寶十一載釋迦牟尼佛阿彌陀佛讚左監門直長高子珍書亦刻於碑側有題年月於側者唐述聖頌是也

開元十三年六月九日

房彥謙碑太子左庶子李

百藥撰太子中允歐陽詢書貞觀五年三月二日樹高乾式造象天寶十三載歲次甲午閏十一月壬戌朔廿四日建立



造碑人檀如洛書人撰人造碑人及年月並在碑側隋以前所未有也若王顏追樹十八代祖碑其側刻請改解城鄉爲太原鄉牒高士廉碑兩側有六代孫尙書右丞元裕正議大夫行給事中少逸會昌四年題字此則孝子慈孫闡揚先烈余所見宋人摩厓題名有子孫過此摩挲手澤一再續題其後者君子之澤遠矣

王惕甫碑版廣例曰漢碑材厚四面刻之其書丹各循其石勢分行布白初未安排或自左而右或自右而左略無定例如開母闕銘文與題名刻之闕南轉及西側此由碑陽而侵之也韓勅碑率錢人數旣多王元等題名其陽王曷等題名其陰山陽瑕丘等題其右側敬謙等題其左側此由碑陰之

軼之也其他或事後續題或他人增識或游覽訪碑者各記  
來觀歲月成陽令唐扶碑有成陽令高某丞史珍二人題名刻在碑首之旁益州太守碑陰有故吏三人題名在跌右

造象多四面環刻刻經或四面或兩面此猶四面之柱六面  
八面之幢但分先後不分正背亦無所謂左右側惟唐齊州  
神寶寺碑其旁刻多心經靈運禪師塔銘側辛祕題名之下  
有菩薩象一龕此則刻經造象之在碑側者也少林寺高岑  
書尊勝咒兩側均有畫象貴池劉氏藏長安四年殘碑兩側  
繪花鳥紋雕鏤工細余所見古刻兩側畫象有上連碑額者  
或作兩螭自額蟠旋而下至側神采飛動宋元碑始有但畫  
雲雷之象及作卐字紋者其制作稍粗矣 右碑側三則

碑之有穿皆在額下碑文之上亦有移而稍下上距碑文三四字其文空格以避之或稍偏左偏右或在額上篆題分列穿之左右安陽金石記載大乘妙偈碑鑽空題有州刺史三字又有大金甲午歲大定十四年寶山靈泉寺講經僧法智題名鑽空當卽碑穿穿中有字惟此一刻逕寸圓孔不曉何從奏刀 右穿中刻字一則

元人有太極宮螭首題字然猶刻石非墨跡也金石錄補載昭陵孔穎達碑螭首嵌空處有至正四年三月顧游特看此碑墨書十二字趙峒子函云在泥土中拂拭之如新子函見時爲萬厯戊午溯至正甲申已二百七十五年而墨書無恙斯足奇也余憶紀文達筆記云在塞外見北魏人摩崖墨跡

亦未摧損又如魏東武侯王基斷碑在洛陽縣出土書丹筆跡拂拭如新蓋曠野蓬蒿深埋塵堞深山絕巘石壁餘衍其地皆爲日炙雨淋所不及得永天年理之所有

右螭首題字

一則

今人碑帖不分凡刻石之文統呼爲碑及墨而拓之紙則又統呼爲帖雖士大夫未能免俗甚矣其陋也夫碑之不可爲帖也石刻之不盡爲碑也周秦漢魏以下歐趙而降撰述源流雕造形製其爲體也屢遷其稱名也雜而不越禮曰遠數之不能終其物悉數之乃留更僕未可終也

右論碑帖之分

一則

綜而論之立碑之例厥有四端一曰述德崇聖

曲阜孔廟諸碑嘉賢

丹徒延陵季子廟有表忠漢紀信蜀諸葛旌孝隴東威孝頌

宋楊傑書嘉賢廟敕表忠武侯碑之類葛旌孝隴東威孝頌

之類稚子石闕鮮于里門以逮郡邑長吏之德政碑是也郡

吏民爲其府主伐石頌德統謂之德政碑是也誦頌字通亦曰清

武定二年濟州刺史關寶賢誦德碑是也誦頌字通亦曰清

德頌如唐才徽元年癸卯陶縣令李府君清德頌天寶五載昭

慶縣令王璠清德頌是也或省去頌字但曰清德碑如聖歷

元年渭南令李君清德碑神龍三年襄州刺史陽公盧正道清德碑

是也亦曰南令李君清德碑神龍三年襄州刺史陽公盧正道清德碑

元龜載廣州爲朱璟立遺愛頌是也亦曰美政頌如安公美

政頌開元二十年房璘妻高氏書見於歐陽公集古錄者

是也亦曰善政碑如宋天聖九年濟源縣令陳省華善政碑

是也亦曰政事記如四川達溪縣有宋政和六年知縣程公

政事記是也亦曰惠政碑如金正大四年趙秉文撰葉令劉

從益惠政碑是也亦曰惠政碑如金正大四年趙秉文撰葉令劉

察使益州長史章抗功德碑是也或變文曰功德頌功德記

並於功德之上隨宜加字如唐貞元五年隴右節度使李元

諒樹昭功德頌咸通十二年高憲神道功德記皆是然釋家

建寺造象亦可稱功德如龍門高力士造象功德碑嵩山少

林寺靈通禪師功德塔銘邠州應福寺西閣功德記長清靈

嚴寺半瑠證明功德記此皆福田利益之說彼教所謂功德

與吏民之頌未可同論又攷集古錄載韋維善政論先天中  
為坊州刺史齊哲撰其實亦德政碑也但變文言論耳按日  
知錄唐武后時制州縣長吏非奉有敕旨毋得擅立碑宋太  
祖建隆元年十月詔諸道長貳有異政請立碑者參軍驗實  
以聞唐澄城縣令鄭叔敖德政碑銘後有左司郎中宇文逸  
修功善狀列銜蓋古人立碑鄭重如此至若屏盜如後周之  
衛州刺史郭進濟州刺史任公兩碑勸農如巴州之紹興十  
六年知府宋學士勸農事實閩中之福昌院勸農記又如河  
東放商鹽額蘇州府學蠲免田租牒之類一善服一日銘功  
膺式刊貞石附記於此亦與人之誦嘉樹之思也一日銘功  
東巡刻石秦李斯登岱勒崇唐泰山銘宋大中祥符述聖向  
述聖紀功唐顯慶四年高中興顏魯公書元叡德孝敬皇帝  
頌以逮邊庭諸將之紀功碑是也漢之裴岑紀功碑唐之平百  
蠻頌平黎一曰紀事靈臺經始斯于落成自廟學營繕以逮  
頌之類

二氏之宮是也

一曰纂言官私文書古今格論自朝廷渙號

以逮詞人之作是也舉此四例若網在綱此外石刻為碣為

表爲誌爲前爲石闕爲浮圖爲幢爲柱爲摩厓爲造象爲井  
闌爲柱礎其製爲方爲圓或橫而廣或直而修或觚稜或瑩  
确皆非碑也因流以討源循名以核實亦可得而揚解也  
右立碑總例一則

一曰石經漢之嘉平

字一

魏之正始

字三

唐之開成宋之嘉祐西

蜀孟氏南宋高宗皆嘗有石經之刻今惟開成十二經

無孟

存西安府學尙爲全本惟字經後人剗改其異同詳見烏程  
嚴氏校文此外祇存殘石或僅存殘拓孤本漢石經據董道  
洪邁所紀高一丈廣四尺後漢書靈帝紀儒林傳皆云正定  
五經文字而蔡邕張馴傳則云奏定六經隋書經籍志云七  
經顧南原曰五經者蓋以儀禮禮記爲一經春秋左氏公羊

傳爲一經與易詩書而爲五實則七經也其石久亡今海內

祇存殘字兩本一爲北平研山齋孫氏藏本一爲錢梅溪所

得雙鉤本同治初兩本皆歸川沙沈韻初孝廉今其家售於

湖北萬觀察航然宋時卽有兩翻刻

洪文惠刻於會稽蓬萊閣胡宗愈又鑄於錦官

西樓亦未必果爲漢刻魏正始石經自宋以來未聞著錄乙未

在會典館福山王廉生祭酒忽以拓本兩紙見示一行古

文次篆次隸各一行云三體石經也中州新出土莫能定其

眞贋其古文頗似宋宣和博古圖所摹鐘鼎文隸書秀勁亦

與尊號受禪諸碑異孟蜀石經其相毋昭裔所造自熹平迄

開成祇有經文惟蜀石經有注據晁公武攷異序孝經論語

爾雅廣政甲辰張德釗書周易辛亥楊鈞孫逢吉書尙書周



德貞書周禮孫朋吉書毛詩禮記儀禮張紹文書春秋左氏  
傳祥字缺筆避孟氏諱亦爲蜀人所書至宋皇祐中田元均  
補刻公穀二傳宣和間席益刻孟子皆正書明曹學佺四川  
名勝志已云諸刻皆不存惟禮記數段在合州賓館中 國  
朝乾隆中錢唐黃小松之父松石先生得毛詩殘字二卷後  
歸於小山堂趙氏一時名流如全謝山厲樊榭丁龍泓諸人  
皆有題識聞之先輩言一黔人士宦蜀得殘石攜歷歸船今  
不知其尙存否宋嘉祐石經章友直楊南仲與張次立同篆  
一行篆字一行眞字但有易詩書周禮禮記春秋左氏傳合  
孝經爲七畢秋帆中丞撫中州時僅於陳留見周禮殘石數  
片孫氏訪碑錄尙有周易尙書殘刻余曾於滂喜齋得周禮

殘拓四紙書易於厥肆見之未之藏也南宋石經高宗御書  
較嘉祐本無周禮孝經而有論孟禮記但有中庸大學學記  
儒行經解五篇高宗又嘗書真草孝經以賜秦檜孔漢谷云  
此別刻石不在太學石經之列易詩書左傳皆小楷論孟結  
體較大明嚴訥石經歌所謂字形僅比黃庭小是也元初楊  
髡欲取以壘塔申屠致遠力爭而止然阮文達輯兩浙金石  
志已祇存八十六石則散亡已不少矣其殘石存杭州府學  
廣州府學有高宗真草孝經一石五層層五十二行行十字  
舊在大成殿後廢爲井牀嘉慶末平陽儀克中搜得之書刻  
年月別爲石已亡

余嘗怪釋氏刻經遍天下房山雷音洞二千三百餘石偉矣

中山之法果寺寶山之萬佛溝或建石或摩厓莫不大書精刻余所藏尊勝陀羅尼經多至四五百通金剛經亦數十通維摩華嚴首楞嚴皆有石本六經自遭秦火漢魏唐宋勾刻之外官私石刻寥寥天壤綜所見聞錄而存之惟孝經有兩全本一爲石臺孝經唐天寶四載明皇御注御書一爲宋光堯御書紹興十四年七月辛未上石在四川遂甯縣初刻本在臨安已孫氏訪碑錄有熙甯五年張南軒書孝經南軒爲攷亭弟佚子熙甯時安得有其石刻孫氏未見原石但據瞿木夫拓本著錄得自傳聞必有譌舛李陽冰篆書謙卦皖中有兩本一在當塗之太平府學一在蕪湖縣學葉紹翁四朝聞見錄云南屏山興教寺有司馬溫公摩厓書家人卦禮中庸大學篇

今尙存湖上禮記無大學而有樂記易家人之外有艮損益  
三卦損卦益卦在幽居洞又節錄左傳晏子語在太子灣皆  
溫公八分書也家人卦紹興十九年溫公之曾孫備倖廣西  
融州復摹刻於真仙巖之石壁同年唐召皆令融縣爲余拓  
得一本趙搗叔云尙有陝蜀兩本則未見也桂林彈子巖有  
南軒書論語問政章此外節錄經文者朱子書易有太極一  
則刻石於武陵敬以直內義以方外八字刻石於道州諸家  
著錄祇此而已元無刻經上饒有六經圖亦未見拓本 右石  
經二則

隋書經籍志唐書藝文志錄九經之後爲五經總義類小學  
諸書附焉以此例推之唐刻開成石經並刻唐元度九經字

樣張參五經文字宋晁公武撰蜀石經攷異亦刻於成都此皆附經而行者也山東滋陽有韓詩外傳殘石此與經別行者也吳皇象書急就篇真草並列優入神妙明吉水楊氏得殘本以宋仲溫書補之刻于松江郡學此字書石刻之最古者也魯公千祿字書初刻於吳興孫莘老置之墨妙亭其石已佚今世所傳者蜀中摹刻本耳

天一閣范氏藏宋高宗御書禮部韻略真草二體嘉定十三年陳汶摹刻其石亦燬於墨妙亭又劉球隸韻十卷紀原一卷亦范氏所藏孤本皆海內希有之笈也韻略不知流轉何地隸韻後歸中江李香嚴廉訪香嚴捐館鎮庫之珍皆歸他姓此本遂不可問津矣宋郭忠恕有篆書說文偏旁字原在

西安府學世不甚珍之竊謂說文形書也點畫之訛毫釐千里非有石本何以賴若畫一乾嘉以來崇尙許學始一終亥之書幾於家置一編而無精寫刻石者非所以嘉惠後學也世有蔡邕邯鄲淳援熹平之例以正文字洵不朽盛業哉

梁武帝得王羲之書千字命周興嗣次韻爲文又詔令蕭子雲寫進是千字文在梁時已有二本隋智永寫真草千字文八百本散於世江東諸寺各施一本今西安碑林中有宋大觀己丑刻一石出於長安崔氏所藏真跡然其中唐諱如虎字民字基字皆缺筆趙德甫謂天寶以後人爲之良爲知言唐初歐褚各有一本歐書貞觀十五年附子

附卽付筆說

隱之明奴

迪之善奴命工摹石安於學舍東壁是當時卽有石本王虛

乃得宋拓於錫山秦氏寶華別墅後以贈黃松石卽小松先生之父也轉展歸衡陽常南陔中丞潭印閣中丞又得何夢華雙鉤本摹刻於石董思翁戲鴻堂帖有率更大字本此集字而成非真跡也褚書有渤海藏真一本余又見明拓本字體略小異曲同工然過於側媚覃溪雖收入唐碑選未敢信爲果出河南也此外篆書有宋夢英一本袁正己以正書釋之草書有唐懷素張長史宋石曼卿三家長史一石已斷裂葆光子亦僅存殘石三段分書有元吳志瀄一家至正十七年十月石藏天一閣范氏行書有趙文敏一家前後俱無跋臣伏字誤書服字旁著一小伏字又有僧啟東白重摹一本並見蒼潤軒帖跋余所見文敏尙有臨智牙真草千文後有至元危

太朴至正元明善各一跋又有六體千字文延祐七年秋九月書爲湖山先生壽一小篆二大篆三八分四章草五楷書六草書後有明萬厯間邢王瑞題字藏印篆籀既不合古法章草亦不逮宋仲溫疑出妄人依託盛氏元牘記所錄又有鮮于伯機草書一本明徐子仁三體書一本皆未見所見明人書衡山大小字不一本雅宜山人王履吉亦有行書一本蓋元明間人能書者大都喜書之

古文奇字讀者不能盡通此釋文所由昉也然不必盡刻於石周石鼓文宋鄭夾漈明楊升庵皆有釋文今國學石本惟附元至元十六年潘迪音訓岫巖碑諸家所釋亦以升庵爲正濟南長山本後附楊時喬釋文又有郎瑛沈鑑兩釋未見



石刻比干銅盤銘宋張淑釋其文曰左林右泉前岡後道萬世之靈於焉是寶漢碑有釋文者溧水校官碑至順四年單禧釋并自書之刻於碑陰宋晏袤釋褒斜鄙君通道碑紹定五年刻又釋魏潘宗道等題名慶元元年刻皆八分書卽摩崖刻於原碑之後唐絳州碧落碑有咸通十一年鄭承規釋文亦刻於碑陰釋草書者唐懷素之藏真聖母諸帖明文氏刻本孫虔禮之書譜析津安氏刻本皆有釋文此亦如宋閣帖中二王草書龍蛇飛舞非有釋文不能讀博山縣玉皇宮有宋四帝御押宣和七年刻後附真書釋文觀於宋金官牒三省列銜下畫押無能識者則所釋爲不徒矣遼金元國書碑往往下截刻譯文以今字讀古字謂之釋以此國之文讀

彼國之文謂之譯其實一也唐梵經幢一行梵字一行真書亦釋文也西夏感通塔碑相傳碑陰卽釋正面番字然西夏書僅有二碑莫能辨之則亦疑以傳疑已耳近出古碑紅崖古字新化鄒叔績獨山莫子偲皆有釋文朝鮮錦山摩崖其國人釋爲徐福題名或云殷箕子書潘文勤師酷嗜古籀每得一古碑必集門下士釋之錦山紅崖兩刻吾郡吳憲齋中丞皆有重釋本埃及古碑黃仲弢學士劉佛青戶部各有釋文顧緝庭方伯嘗告余一聯云善辨模倣字媻攻穿鑿文雖謔而未爲虐也

右字書小學類四則

一曰封禪王氏碑版廣例曰古稱封泰山者七十二家勒石千八百餘處今傳於世自秦刻石以外無聞焉唐高宗元宗

皆嘗東封元宗爲盛其文御製御書摩厓高二丈九尺字徑五寸題額字一尺九寸漢以來碑碣之雄未有逮者以明皇之才而燕許修其辭韓史潤其筆欲不工而不可得矣又云張說封祀壇頌蘇頌朝覲頌皆見於唐文粹余按蘇丞相東封頌卽刻於明皇御書之側按楊甫先生又據王介洲云闕人林焯以四大字刻其上惡札題名縱橫漶滅介洲此言蓋指蘇丞相宋眞宗登岱勒崇御頌若元宗銘雖有殘泐固猶在厓壁也製謝天書述二聖功德頌親瀋宸翰以書之青帝廣聖帝君贊亦御製御書亭亭山廣禪侯敕并祭文無書撰人以中嶽北嶽御製醮告文例之當亦眞宗御筆也孫錄又有廣禪侯祠祭告文碑疑一石重從臣奉敕書撰者封祀壇頌王旦文裴瑀書封禪朝覲壇頌陳堯叟文天貺殿碑楊億文二碑皆尹熙古書高里山

禪社首壇頌王欽若文以上諸碑今並在泰安皆大中祥符元二年刻穹窿高揭規模宏偉想見云亭封禪之儀此外汾陰有御製二聖配享碑王旦祀汾陰碑尹熙古書杞縣有先天太后贊漢之五時不是過已右封禪一則

一曰詔敕秦始皇帝東巡立石具刻詔書漢孔廟百石卒史碑先以臣雄司徒吳雄臣戒趙司空之奏制曰可王言勒石莫先於

此唐比干廟有貞觀詔曲阜孔子廟有高祖高宗詔書兩道

宋有文宣王加封號詔

大中祥符五年

辟雍詔

徽宗

藉田詔

紹興十六年高宗御

筆其文皆施之大典禮自餘通謂之敕有專敕有通敕或獎

諭臣子如唐賜張說宋諭程節之類或崇敬緇黃如少林寺

賜田敕還神王師子敕樓觀褒封四子敕之類其文多刻於

碑陰間亦刻於碑之上方以示尊君之義或臣下奏請報可  
或先賜敕而後表謝往往一面刻表一面刻敕如青城山常  
道觀碑之類凡此皆專敕也若通敕唐有令長新誠宋有戒  
石銘當其始頒行天下郡邑無不立石余所見新誠惟開元  
廿四年一通王良輔書其石在中州出土孫氏著錄陝西大  
荔縣有開元二十五年韋堅書一通按集古錄曰云元宗擇  
令長一百六十人自製  
新誠宰相裴耀卿等請令集賢院善書者書以賜之其後諸  
縣往往刻石瞿木夫云歐陽公所得者六河內虞城汜水穰  
舞陽其一不知所在金石錄目有開元廿四年二月者三一  
云汜水縣一云房縣其一亦缺其地又有元和三年七月  
王通篆書者在虞城縣而寶刻類編又載劉飛書開元中刻  
在鄧州鄭宗甫書大和九年建在許州陸劭聞云蜀碑記唐  
令長新誠在合州赤水縣開元二十四年立景祐中重刻之  
元宗新誠見於著錄者如此陵谷變遷後人之所見或有前  
人所不及其文並同宋太祖戒石銘黃庭堅書高宗詔天下  
見者懃

摹勒今梧州府治尙有一石分四層其第三層卽高宗諭粵  
西叢載言戒石銘在橫州甬道今石已佚而趙撫叔續訪碑  
錄蒼梧之外尙有道州一刻雖未見大抵皆黃書一石重摹  
理宗有訓廉謹刑二銘亦詔天下摹勒而未見一本徽宗時  
頒行天下之石刻最多有辟雍詔崇甯三刻一元年在陵縣  
一四年在山陰一五年在邢臺一大觀元年刻在鉅野邢臺  
鉅野兩刻余皆有拓本並蔡京題額薛昂撰後序刻於碑陰  
以此推之他郡邑當並同又有八行八刑碑諸家目錄或於  
八行上加學校二字或於八刑下加條制二字其實一碑也  
孫氏訪碑錄有大觀元年一刻在觀城縣二年有四刻一在  
濶化鄭仲先書一在高陵張璪書一在臨潼王電書一在臨

頴又三年一刻在滎陽皆無書人名崑山有政和三年一刻  
陳光庭書余藏一本則大觀二年蔡京書鄭允中立石出土  
較晚孫氏所未見也大觀聖作碑據孫氏所見拓本河南之  
偃師山東之城武荷澤諸城泰安新泰陝西之興平江蘇之  
句容共九種余惟得句容一種亦蔡京書鄭允中立石與八  
行八刑碑年月並同蓋一時所刻此外又有御製五禮記孫  
氏所錄一在元城冠以大觀字一據趙晉齋拓本冠以政和  
字則以所刻年月別之余得殘字一本年月已缺大抵道君  
御製皆命蔡元長書篆亦有御書者卽世所稱瘦金體也清  
勁可愛出於古銅甬書亦頗近唐之二薛及暢整清河公主  
碑未可以衰世君臣而遽忽之元不稱敕通謂之聖旨碑諸

王太子稱令旨鄆縣草堂寺有闕端太子令旨碑

草堂寺碑分四段最

下一段稱鐵哥火魯赤都元帥鈞旨

涇陽有旭烈大王令旨碑是也后妃稱懿

旨如直隸易州皇太后懿旨碑曲阜皇妹大長公主懿旨碑

是也錢竹汀跋易州碑云凡元時聖旨碑首題長生天氣力

裏大福廕護助裏皇帝聖旨此稱長生天氣力裏皇帝福廕

裏皇太后懿旨當時寫聖旨懿旨之式如此其通敕則至元

三十一年有崇奉孔子詔孫氏所錄卽有曲阜一刻江蘇吳

縣崑山華亭溧水四刻大德十一年有加封孔子制孫氏所

錄同時卽有二十石尙有至大皇慶中追刻者至順二年有

加封啟聖王及王夫人制加封文宣王夫人元官氏制加封

亞聖父母制加封孟子亞聖公制加封復聖宗聖述聖亞聖



四公制或分顏孟爲一制曾思爲一制又合先聖父母妻并  
四配爲一制其體式略異其文詞則同余所見大德碑或分  
三層或分二層一層爲蒙古書一層以漢文譯之其下層記  
年月亦有刻記於碑陰者今天下郡邑學宮凡元時建縣未  
經兵燹倫堂禮殿其石尙皆無恙碑估往往不遠千里重趺  
訪古至則不得古刻僅拓元時詔旨一二通以塞責余所收  
得加封孔子制在孫錄之外者已有四五通見而未收者雅  
不止此然制文雖同其下方官吏姓氏參稽史傳往往有裨  
考證亦未可竟廢厥肆一老估嘗告余云君見刻經造象輒  
收之宋元學宮碑卽有選擇何溺於彼教邪余竟不能答  
詔敕之外唐有告身宋有告詞吾吳有五龍廟告詞西湖岳

廟有紹興復官告詞一道又有嘉泰追封寶慶賜諡告詞各一道明隆慶間刻唐之告身以顏魯公所書朱巨川一通爲最著又咸通二年范隋告第一行將仕郎權知幽州良鄉縣主簿范隋第二行右可柱國下爲告詞其後中書門下各有奉敕年月列名皆三人第一人皆不書姓名中書後二行曰中書侍郎兼工部尙書平章事臣杜審權宣奉曰駕部郎中知制誥臣王鐸行門下後二行曰右僕射兼門下侍郎平章事  
名闕 事  
惊曰給事中渢末有主事吳亮令史楊鴻書令史  
名闕 在下列錢竹汀跋宋妙應真人告詞云三省例由中書取旨門下錄黃而後尙書奉行其次第如此中書省承旨之地故省官稱臣具姓名門下省官有名無姓亦不稱臣主事令史等

以卑故具姓名此當時案牘之式以范隋告證之則唐時告身已如此宋特沿唐制耳但皆藏於家廟後裔榮其祖父以彰君賜或摹而刻之石或後人得前人之名蹟而彙刻之當時未聞有刻石者故石本絕少余曾見董文敏仿唐碑各體爲關中王氏書先世歷代諸敕眞行諸體悉備此則從軸木傳錄非頒降體式也

潛研堂金石文跋尾曰東嶽廟聖旨碑

泰安嶽廟延禧殿前泰定元年十月文

稱成吉思皇帝月古台皇帝薛禪皇帝完澤篤皇帝曲律皇帝普顏都皇帝怯堅皇帝後題泰定元年鼠兒年十月二十三日又一碑文稱成吉思皇帝月古台皇帝薛禪皇帝完者都皇帝曲律皇帝普顏都皇帝格堅皇帝忽都禿皇帝亦憐

眞班皇帝後題至正四年猴兒年九月二十九日按成吉思  
太祖尊號也薛禪完澤篤曲律普顏篤格堅忽都禿則世祖  
成宗武宗仁宗英宗明宗之諡身後所追上也太宗甯宗未  
有國語諡號故稱其名元史泰定卽位詔書稱英宗曰碩德  
八剌皇帝其時尙未有國語諡也文宗國言曰札牙篤皇帝  
至正碑不及者以其與於弑逆黜之也月古台元史作窩闊  
台錢氏養新錄曰朝城縣興國寺令旨碑第三道旨稱匣合  
皇帝在成吉思皇帝之後口口皇帝之前則太宗也元初  
風俗質朴太祖成吉思之號生前所上太宗而下皆以名稱  
太宗之名史作窩闊台祕史作幹歌歹余所見元聖旨碑或  
作月古台此又作匣合譯音無定字當時不以爲嫌普顏都史作普顏篤忽都禿史作  
忽都篤亦作護都篤亦憐眞班史作懿璘質班又如完澤篤  
之爲完者都格堅之爲怯堅兩碑亦互異蓋譯音本無定字

當時播諸王言亦未盡畫一也

王言如綸其出如絲渙汗大號憲章百世惟元人起自朔荒  
廟堂制敕猶沿椎髻之風開國之初崇尚道釋琳宮梵宇往  
往有聖旨碑皆緇黃請免徭役之詞其體式略同余所藏卽  
有十餘通茲錄襄陽五龍廟一通以存當時制度

長生天氣力裏

一行

大福廕護助裏

二行

皇帝聖旨軍官每根底軍人每根底城子裏達魯花赤官人  
每根底來往的使臣每根底宣諭的

三行

聖旨

四行

成吉思皇帝

五行

月闢台皇帝 大行

薛禪皇帝 七行

完者都皇帝 八行

曲律皇帝 九行

普顏都皇帝 十行

傑堅皇帝 十一行

忽都篤皇帝 十二行

札牙篤皇帝 十三行

亦憐真班皇帝聖旨裏和尚也裏可溫先生答失蠻不辣甚

麼差勞休當者與告 十四行

天祈福者道有依著在先 十五行

聖旨體例裏不揀甚麼差發休當告

十六行

天與

十七行

咱每祈福祝

十八行

壽者麼道襄陽路均州有的福地武當山大五龍靈應萬壽

宮裏有的甲乙住持主領宮事兼領

諸宮觀事教門高

士崇元

十九行 此行到底

法師邵明唐住持提點教門高士通元靈應明德法

師李明良爲頭兒先生每根底執抄口的

二十行

此行上

空三格

聖旨與了也這的每宮觀裏房舍裏他每的使臣休安下者

鋪馬祇應休拿者商稅地稅休口者但屬這宮觀的莊佃田

地水 廿一行

磨解口庫店舍鋪席浴室船隻竹竿醋麪等不揀甚  
麼差砂休要者更這蒿口蒿坪梅溪雙峪白浪坪堰等處村  
子口口 廿二行

地水土不揀甚麼物件不以是誰休倚氣力者休奪  
要者更這先生每有 廿三行 上二行俱低三格

聖旨麼道無体例的勾當做呵爾每更不怕哪 廿四行

至元三年牛兒年三月二十日大都有時口寫來 廿五行

右聖旨廿四行年月一行凡元時宮觀聖旨碑舉此可  
以類推体卽體之俗字每卽們字月古台古作闊怯堅  
作傑堅所謂譯音無定字也



鄆縣重修草堂寺碑分四段上兩段闊端太子令旨下一段

皇太子令旨最下一段鐵哥火魯赤都元帥鈞旨按孫氏所

錄山東朝城縣有興國寺舍利塔令旨碑錢氏養新錄曰興國寺令旨碑一為

合刺查太子令旨猴兒年三月初七日和林城子寺裏寫來

一為皇子忽察大王令旨乙巳年九月初三日合刺腦兒寫

來一為密里吃臺太子令旨不見年月皆刻於一碑合刺查

者太宗第四子哈刺察兒也忽察者定宗長子忽察大王也

密里吃臺者闊端太子之子滅里吉歹王本太宗之孫當時亦通稱太子也淄川縣有炳靈王廟

八不沙令旨碑元貞四年河南濟源縣有公主皇后付靈都宮懿

旨碑至大三年此可見元時諸王后妃立言之制右詔敕五則

一曰符牒隋以前未有也唐嵩山少林寺牒武德八年龍門奉先

寺牒開元十年其最初矣此外惟大中五年敕內莊宅使牒亦為

唐刻容齋三筆云唐世符帖存者絕少隆興府總持寺有一

碑凡三牒今總持三牒已亡卽嵩洛兩碑攷之亦可見唐時  
官文書格式宋牒視唐倍徙金牒又多於兩宋案錢竹汀跋  
廣福院牒云凡寺院賜額宋初由中書門下給牒元豐改官  
制以後由尙書省給牒皆宰執親判金則僅委之禮部而尙  
書侍郎並不書押惟郎官一人行押而已但宋時寺院皆由  
守臣陳請方得賜額金則納錢百貫便可得之蓋朝廷視之  
益輕而禮數亦替矣此大定一朝敕牒所由獨多歟碑曰於  
宋時或稱中書門下牒或稱尙書省牒由潛研之言徵之則  
元豐以前皆出中書元豐以後皆出尙書省金廣福院稱尙  
書禮部牒又有省尙書二字但稱禮部牒者  
大定二年圓教院三年福嚴禪  
院其實凡牒皆出自禮部不僅此三寺也諸牒或刻於碑陰

惟咸甯香城寺牒

淳化二年

刻在地土碑之下方皇祐五年南海

廟牒上層并刻奏狀下層刻至和元年元絳記此例亦多有之凡牒必奉敕宣付故其文輒云准敕故牒金石著錄亦敕牒互稱余所見石本敕牒多各爲年月或遲之數十年而後刻或百餘年而後刻又皆有刻石之年月著錄家彼列在前此錄在後往往一石重出宋制敕牒之外又有公據以紹聖四年戒香寺一通爲最古南宋著錄指不勝屈其制不上請卽由所在官司給付此外有省劄有部符有使帖省劄給於尙書省部符給於禮部使帖當給於常平茶鹽諸司此類刻石亦至南宋始有之

陝西府谷縣有政和二年十一月尙書省指揮吾吳之江陰

縣藝風前輩新訪得建炎紹興復軍二指揮寄余拓本釋而讀之亦牒文也前有准狀云云後有某年月日奉勅故牒尙書省官下押字其體例皆同惟其額題曰復軍指揮冠以年號牒文之末又有伏候指揮字故著錄家因而書之非牒之外別有指揮也藝風雲自在盦碑目仍書曰復江陰軍牒得其實矣

劄子之制王氏萃編載景祐二年永興軍中書劄子一通前列戶部侍郎知河陽軍范雍奏末云右奉聖旨依奏劄付永興軍准此者詳繹文義如今廷寄之制由中書門下奉旨宣付軍州案山西通志大中祥符八年陳堯佐劄子石刻在今鳳臺縣天井關文廟內前書河東轉運使劄子奏後書年月

拓本未見以牙興軍劄證之其體例當同

孫氏訪碑錄堯佐二劄一在鳳臺一

在絳縣年月並同當是一石而誤析爲二

潛研堂金石文跋尾宋金勅牒攷證最詳可見當時文書格式輯錄如後

宋理宗賜杜範勅 右理宗賜杜範勅凡七行首行勅字上鈐書詔之寶後題二十六日不署年月末行一勅字極大又有勅杜範三字亦鈐書詔之寶外周有長方界似是封皮也下方有杜範跋後題嘉熙三年七月日

吳福禪院牒 月日之上鈐以中書門下印後兩行曰樞密使檢校太傅平章事駙馬都尉趙曰樞密使檢校太傅平章事范皆姓而不名以史攷之蓋趙延壽范延光也又後兩行

曰樞密使檢校太傅平章事范封曰中書門下牒冥福禪院亦用印鈐於字縫凡五處此非牒乃牒外之封識獨以班首一人列銜當時文書之式略可見矣是時馮道李愚劉昫同中書門下平章事乃眞宰相之職此牒出於中書門下而押行者惟趙范二人政由樞密其居相位者雖尋常文書亦不復關白非見此牒烏能知之

景德寺中書門下牒并澤州帖 牒以十一月下而澤州帖以十二月下帖尾知軍州事石判官葉推官趙錄事參軍王司戶參軍孫五人皆有押其序自左而右知州列銜獨高判推僅及其半錄事司戶又下之牒上有中書門下印一方帖上有澤州印三方宋世公文之式蓋如此

案石本印文多淺細押字筆畫糾紛

加以剝蝕拓本模糊當時重  
押文字末由細辨亦一憾也

靈祐觀中書門下牒 牒尾列銜四人馮拯丁謂二人不書  
姓者周必大二老堂雜志云祖宗朝宰相官至僕射勅後乃  
不著姓他相官階自吏部尙書而下皆著姓

勅封順應侯牒 前列太常禮院奏十一行後列勅文五行  
皆正書而首行中書門下牒五字牒文內兩勅字行書勅字  
特大而縱

太原府帖 帖後列銜者八人最後一行皇兄河東山南西  
道節度使守太師開府儀同三司太原牧兼興原牧陳王蓋  
徽宗之兄秘封申王者也宋時諸王外戚領節度使者皆不  
之鎮而府帖猶存其銜旁注在京字此一代典故見於石刻

攷官制者所宜知也

升元觀牒 陸游老學庵筆記云自唐至本朝中書門下出勅其勅字皆平正渾厚元豐後勅出尙書省亦然崇甯間蔡京臨平寺額作險勁體來長而力短省吏始效之相諗尙謂之司空勅亦曰蔡家勅蓋妖言也至今勅字蔡體尙在此碑勅字正所謂蔡體也

提據常平司公據 右提舉常平司公據在蘇州雙塔寺前提舉常平司五字後右今出給公據付雙塔寺仰收執照石刻亦有變其稱爲執照者以此寶慶元年六月日給廿二字皆大最後一行使字更大下有押而不署姓蓋當時公牘之式如此 右符牒

四則



一曰書札長牋短啟江左擅場昇元太清而下轉展鉤摹之  
帖賞鑒家津津樂道之錄碑者弗尙焉魯公與郭僕射書王  
蘭泉著於錄孫氏訪碑錄有奉使蔡州書究其實亦後來所  
摹刻與鹿脯帖何異帖類而非碑類也蘇黃米蔡諸家與趙  
文敏墨妙如林亦當以此例甄別之惟浙之金華縣有劔南  
與玘公禪師八札刻於重修智者廣福禪寺記之陰嘉泰三年桂  
林水月洞有慶元丁巳杜思恭所刻放翁手跡共書一通詩  
七首朱子謂務觀筆札精妙自命草書學張顛行書學楊風  
此兩刻庶幾碑版文字以余輯錄之勤篋衍止斯右書札一  
則

一曰格論書棚帖肆以世所傳太上感應篇及陰騭文之類

楷書精寫刻石裝池售之學僮既便臨池肄業即可爲座右

銘其用意良善而不知古刻已先有之

魏志裴松之注明帝詔曰先帝昔著典論

不朽之格言其刊石於廟門之外及太學此出於孝子元至慈孫之意典論但屬論文未可謂之格言也兩石皆佚

正壬辰太上感應篇注釋碑

陳君實輯有仇山村跋

後列勸善二十六

事懲惡一百七十事其石舊在湖山堂今尙存杭州府學西

安府學有至和元年裴珍書小學規嘉祐八年李寂篆書昌

黎五箴吾吳郡學有南宋朱協極分書中庸格言此三石一

眞書一篆一隸皆謹嚴便於初學又有錄史傳之文以垂戒

者如張安國節書漢疏廣傳戒子弟語及唐盧坦傳孫氏訪

碑錄但有蘇學石本余所見尙有當塗本疏廣傳題淳祐辛

丑後五年陳塏再刻之當塗道院盧坦傳刻於寶慶丙辰又

有衡陽一本無年月大抵皆一石重摹昔我有先正其言明  
且清又曰其惟哲人告之語言是亦碑林之龜鑑矣 右格論  
一則

一曰典章自范希文以義田贍族吾吳素封之家至今睦婣  
任卹尙有古風凡置一莊建一祠敬宗贍族之規必刻石以  
詔後來大抵卽范莊規矩而損益之范氏規矩政和七年范  
正圖書元至元甲午裔孫邦瑞士貴重刻其石今猶存義莊  
攷漢之西嶽華山碑孔廟乙瑛史晨諸碑兼敘品節儀制甚  
詳詩云不愆不忘率由舊章此卽所謂舊章也至唐之濟瀆  
廟雜物銘宋之桐柏淮源廟規約始專刻一石而揭之此又  
邇豆司存之義也大觀聖作碑後列告諸士十一條前八條

論孝悌睦嫺任卹忠和八行之義及三舍選法免戶免身丁  
法後三條論八刑嘉定元年王介甫遠記爲大學葬遠方士  
子而設後列祭葬守冢之制三則略陽縣靈巖有宋淳熙辛  
丑邑令王某刻儀制令十二字曰賤避貴少避長輕避重去  
避來上刻儀制令三大字武授堂金石文字跋曰東都事略  
太平興國八年詔宜令開封府及諸州於衝要處設榜刻儀  
制令陸劭聞據宋史孔承恭傳謂太宗之詔因承恭疏請唐  
六典禮部載凡行路之間賤避貴少避長輕避重去避來宋  
制實仿於此此皆當時條教頒行天下也慶元中吳學有義  
廩規約主之者黃由葉適出納之節懶若畫一又若臨胸沂  
山東鎮廟有金大安三年禁約碑臨桂有經略范公勸諭此

爲今告示勒石之濫觴東南一閩之市山場廟社多有三尺  
小碑雜置牆隅園溷間過者掩鼻其詞則切切毋違之類也  
余嘗戲謂打碑人曰過五百年卽爾輩衣食資矣右典章一則

一曰譜系古時宗法未亡族葬掌於墓大夫墓道之中意必  
有刻石誌其昭穆之兆域而今亡矣惟越之餘姚新出漢三

老諱字忌日記具詳生卒年月皆在漢建武中

元歸安報恩光孝寺遺田

山碑後列檀越捨田皆爲追薦忌日有郡城迎春界趙承奉  
修崇先考府判朝散公二月二十二日忌郡城報恩界任安  
人薦亡男口二知錄六月初九日忌辰郡城董千五下缺修崇亡夫  
考妣二位正月二十一日忌辰郡城董千五下缺修崇亡夫  
董千五郎四月初五日忌亡男董萬四郎五月初五日忌府  
城飛英界陳六七秀才修崇曾祖下缺忌辰尙有五條皆割  
蝕  
唐咸亨四年鄭惠王石記其後云謹件先皇子孫勒諸貞

石白嗣鄉王郢州刺史璣至邵陵公珩共十子魯公所書郭敬之家廟碑碑陰列敬之男八人皆汾陽兄弟行也孫十五人曾孫三人並詳其官位並於子儀男曖下注云尙昇平公主元和四年樂安孫氏石刻具列一家長幼男婦別無文字此必唐時墓道之石敦煌有李氏舊龕碑武周聖歷元年刻碑陰世系上溯皋陶爲唐虞理官以官爲氏後理貞以避難改姓李其後列祖諱至子姪三層具詳官闕宋石介撰雲亭里石氏墓表由曾祖而下五院分爲十五院三十二墳詳列名諱世系所生子女及女所適氏族曲阜孔廟有宣聖世系碑吾吳至德廟有泰伯世系圖至元時北方世族多有先塋碑余所藏至正甲午董信公孝思碑其陰有董氏宗派圖洙

水龍泉里傅伯純塔分八面刻其一面列伯純五子及五子所生之男女皆分支挂線孫氏訪碑錄所收有偃師陳氏先塋碑後至元濟甯楊氏祖塋碑楊碑之陰其額爲祖宗之圖四大字當亦世系圖也竊謂祠墓之碑皆可本此例以世系勒於碑陰則譜牒卽有散亡石刻猶在不至無徵不僅此也元時卽寺院之碑其陰亦多有宗派圖嘗見神通寺敬公塔一面卽爲宗派圖旁行斜上曲折分明他如嘉祥之洪福院章邱之靈應觀碑陰皆如此此亦禮失求野之意也夫

我生之前三年

道光丙午

許州民穿井得冢中甌文五通一曰濟

甯陳祚一曰從掾鉅鹿魏听一曰後殿虎賁梁國張興口一曰武勇掾樂安肥範一曰高陽北新城邵巨皆魏青龍二年

造趙撫叔曰蓋造冢時記亡者年月與三老忌日記同意按  
正定花塔寺有唐開元十五年佛座刻唐諸帝后忌辰蓋古  
人忌日刻石本有此例特漢魏唐三刻皆近時出土歐趙諸  
家所未見故無舉例及此

右譜系二則

一曰界至癸巳甲午間莒州新出漢碑四面刻字隸書古拙  
剝泐過半卽其詞句相屬者紬繹之蓋經界碑也釋氏謂之  
大界相余所藏有唐永泰二年豐樂寺大界相碑所見有宋  
景祐五年明州保安院大界相碑唐碑從此住處大院牆東  
南內起仍還至大院牆東南內角止年月之下云結此寺大  
界末一行云其日結此寺爲遍藍淨宋碑從此院外東南角  
石標外竹籬內角起仍還至院外東南角石標外竹籬內角



止下卽云此是大界相後有秉大界羯磨秉淨地羯磨諸僧  
四正四維循環曲折還相爲宮在石刻中自爲一例且所傳  
止此二碑特自來無拈出者耳阮文達云界相卽地形變文  
余謂此是禪家語質言之則四至而已矣元至元十六年有  
天真觀四至題字縣大德三年有月華山林泉禪寺四至碑  
僧性空書至大二年有浮渡山華嚴禪寺修造四至記余僅有浮  
山一刻天真林泉兩本皆未見大旨皆具列東西南北所至  
之地但分四柱直敘非如界相爲禪門之規律蓋一爲世法  
一爲出世法也鄭喬璿同年寄臨朐拓本內有仰天山四至  
石刻一通宋元符三年刻元文殊院山界公據碑亦在臨朐  
長清靈巖寺有金天德三年山陽界至圖記以山爲界則廣

於寺矣蜀中新出隋大業四年始建縣四至石刻以一縣爲界則又廣於山矣此如今之界牌碑余又藏大朝壬子萬歲禪院四至石幢陀羅尼咒後詳列地產本寺之外兼及靈壽平山兩縣莊地宋廣慈禪院莊地碑前列天福六年牒後列淳化三年院主師忠狀其後記東北兩莊畝步四至重眞寺田莊記同但無狀牒此如今之田房稅契有牒者爲官券無牒者爲私券吾吳郡學號五百畝惟有附城地界一碑趙撫叔所收僅有無極文廟四至記吾儒經營締構以視釋氏殆不如也然釋氏之學主於觀空山河大地如夢幻如泡影觀以上諸碑安在其能觀空邪

房山有開元十八年金仙長公主奏賜譯經上垞村趙襄子

淀中麥田莊并果園一所王守泰記石浮屠之後云東接房  
南嶺南逼他山西止白帶山北限大山分水界並牙充供給  
後又列三行云東至到南至河 西至河北至他山 四至  
分明牙泰無窮王蘭泉云四至八到始見於元和郡縣志繼  
見於太平寰宇記地志因之此以寺記而後列東西南北云  
四至分明後人田宅署券蓋仿於此又按宋天聖八年逍遙  
栖禪寺水磨記年月題名之後有一行云其磨地窠東至高  
觀澗南至澗西至坡陵上頭陵頭通人過往北至草堂寺而  
總結之曰已上四至金大定丙申凝真大師成道記後列靈  
泉觀山林水磨田土地基共二十二所每一所各有東西南  
北四至

重真觀田莊記同

視他碑尤爲詳覈

金大安元年眞清觀牒後列置買地土文契附錄於此以證  
今之田宅契有所濫觴焉

本觀置買地土文契

出買地業人修武縣七賢鄉馬坊村故稅戶馬愈男馬用  
同弟馬和自立契將本戶下□□地二段共計貳畝叁厘  
立契賣與全眞門弟子王太和王崇德爲永業修蓋全眞  
道庵準得價銀壹拾陸貫文各七口九伯並契卽目見定  
交割謹具開坐如後

一出賣村南竹蘭地一段南北畛東長貳拾陸步伍分西  
長貳拾陸步伍分南闊壹拾陸步北闊壹拾步并次東一  
段東長貳拾陸步西長貳拾捌步半南闊壹拾步北無步

一東至大河西自南至南自至北自至並拋各業主對目商議  
定所有地內差稅物力實各照依通檢去馬愈戶下貯腳  
供輸所拋地內竹竿樹木不係賣數

天雨水透流車牛出入一依仍舊通行

右件前頃出賣地土賣與全真門弟子等爲永業並不是  
衷私卑幼口交亦不是債欠準折並無諸般違礙又加立  
契日一色見交領並口別無懸欠恐人無信故立此文  
爲拋

大定二十八年十二月自立契出賣地人馬用 押

同立契人馬和 押

引領人部下王守鈔 押

寫契人本村王瑩 押

稅說價銀壹拾陸貫文

王蘭泉曰年月後一曰立契出賣地人卽今之賣主也  
一曰同立契人卽今之賣主親族也一曰引領人卽今  
之中人也一曰寫契人卽今之代書也余按契中厘字  
多字拗字皆與今契券俗字同則知市廛承用之體亦  
有所本也

王氏萃編曰重修大像寺記所載莊地果園四至近他人者  
著他人姓名近本寺地則曰自至又晉天福四年廣慈禪院  
殘牒末載置宅券云某年月日買得某處某姓名宅壹所准  
作價錢若干後載北至某處東至某處南至某處西至某處

賣宅人某弟某母某年各若干保人某莊宅牙人某此可見  
五代時賣宅契券之式

按此一條當與券前  
參看右界至四則